

晚

晴

移

詩

匯

晚晴簃詩匯卷一百九十八目錄

釋子

野蠶 九首

慧霖 二十三首

覺詮 二首

顯清 一首

了亮 三首

性慧 二首

圓能 二首

明德 一首

定源 一首

覺燈 一首

祖觀 二十二首

了禪 七首

自成 二首

大須 三首

聖教 二首

徹凡 四首

昌仁 二首

含澈 一首

靈照 二首

敬安 四十首

晚晴移詩匯卷一百九十八

釋子

徐世昌

野蠶字夢綠合肥人本姓宋名啟祥開封相國寺僧有

夢綠詩鈔

詩話夢綠本諸生中歲學佛工文字寫蘭竹瀟灑有致詩清雋超逸不作凡俗語有題鍾馗象句云得失科名關面目披圖一哭後來人蓋其不得志於科名有觸而發也

晚坐

地荒增寂靜人老減聰明酒斷江湖興詩牽呖畝情山泉清似野鄉月大於城晚坐幽篁裏茶煙縷縷生

上厚菴太守

不爲尋京尹誰輕千里來河聲天上落山色鏡中開氣節標南嶽詞華光北臺政閒公府靜碁局與茶杯

記取論詩處窗明霍六山眼青千里外頭白十年間鹿苑
應相憶龍門許再攀彭城風俗美禪坐欲忘還

春草

綠淺香柔絕點塵亂如絲縷疊如茵閱殘野火千秋劫鬪
盡東風六代人池上有誰還得句江南無此不成春和煙
和雨年時路知否王孫最損神

登三汊河口浮圖

千尋如湧出煙汀絕頂奇搜入杳冥天到潤州連海白山
從建業過江青層層梯折疑穿洞面面門開好摘星欲與
老僧論下界六朝宮闕一浮萍

留別張錦溪老人

蘆簾不下錦溪東瘦綠肥紅一萬叢種豆詩吟山色裏換

鵝經寫水聲中隱居絕似淩風鶴過客還如踏雪鴻明日
一帆江上掛相思千里暮雲空

還山後寄張北干洛下

一葉風帆兩地分新詩高唱許誰聞雪荒江月都成水山
老梅花欲化雲稚子那知朱亥里酒人爭問信陵墳舊愁
銷歇新愁起三夜西窗夢見君

由下關復之廣陵

風落寒潮塞雁橫嚴關重泊一篙輕人間詩草無官稅江
上狂徒有酒名幾點塔鐙離建業半鉤沙月又蕪城不知
何處潛吹笛夜雨瀟瀟十載情

江上尋屈徵君斯齋

乘興雙橈駕碧潯水煙遙抹樹森森園中種菜英雄老江

上披裘歲月深三徑草連沙嶼滿六朝山護席門陰等身
天厚虞卿意一鋪無殊五嶽吟

慧霖字梅龢新建人本姓李有松雲精舍詩錄

詩話梅龢四歲出家詩多悟境後從黃樹齋諸公游風格益上未始不以學成也

棲賢寺

五老雲中喚不謗名山從未要人稱虎頭寫出莊嚴相舍
利光分大小乘三峽波濤驚過客一龕風雨定詩僧昔賢
跨鹿來棲止深夜攤書借佛鐙

小孤山

卓然空倚傍高放出雲頭吳楚分中界金焦截下流蕩搖
空水國孤秀矗僧樓來往風帆利何人據上游

次硯生雪夜見懷韻

僧家隨地置蒲團雪夜遙知憶懶殘孤鶴夢歸雙腳冷野
梅花孕一身寒窮年真覺讀書好連日應歌行路難我未
出山頻打坐笑將饒舌數豐干

舟中感懷疊前韻

一葉蒲帆掛向東旗亭西望憶諸公新愁似水浮天外舊
夢如雲到客中太白才名因酒重杜陵老病坐詩窮夜來
湖上纔搖筆便有魚龍喚雨風

絳拽篙撐各自謀舟師努力向灘頭江山對面迎殘客花
鳥多情勸小留下水太難下太易順風何喜逆何愁此行
堪把郵程計廿六灣過到信州

嚴灘過子陵釣臺

自著羊裘老富春畫工辛苦繪功臣先生到處堪高隱天

上宵來卧故人七里江聲終不斷四圍水鳥亦相親利名
淘盡塵中事留得乾坤一釣綸

西湖放歌

曩聞西湖景奇勝甲天下今年六月始來遊所聞不及所
見者西湖山如畫圖樓臺縹緲開蓬壺西湖水清見底淨
碧荷花香卅里若將西湖比賢士光風霽月何清美若將
西湖比西子澹妝濃抹洵如此白公蘇公兩仙才爲政風
流先後來酒魂詩魄在何處夜深飄渺雲車回表忠舊蹟
祠宇在蘇小墳頭春似海英雄事業兒女情頻仰千秋發
深慨金牛之湖尙可游銷金之窩安得留吁嗟乎人生到
此亦快意何必五嶽名山一一窮搜求

冬夜獨坐

我本無爲者端居一室中孤鐙空照雨四壁冷棲風交以
性情合禪因文字通法雲何廣大彌布十年功

平山堂

平遠樓臺據蜀岡三峯起伏萬松蒼風流太守開公讌江
上諸山到此堂曾製荷觴傾碧釀尙存柳蔭似甘棠醉翁
之意髯翁得同熱文忠一瓣香

閨中秋玩月

禪邊風味客邊愁饋我清光又滿樓一月可曾開幾日百
年難得閨中秋菊花信待重陽久桂子香聞上界留遮莫
圓明似前度不知誰續廣寒游

遣懷

雲自高飛水自流清風拂拂擬仙遊寸絲不挂真行腳長

物全無且掉頭未到百年空萬想能超一劫已千秋前因
後果分明在欲喚山猿與唱酬

翼日坐雨

陰晴莫定花朝去風雨飄蕭社令來人是陶公還乞食世
無鮑叔肯通財古今商略書千卷天地蒼茫酒一杯春在
江南誰問訊鶯飛草長任徘徊

硯生太史將入都同人於重陽後三日就菊設餞以
屋小於舟人澹如菊分韻得屋字

桂石已無山松雲尙有屋君還玉照堂不羨王官谷索笑
春尋梅擷芳秋摘菊離懷託篇什共向離根讀送酒勞白
衣敲詩翦紅燭更偷半日閒相勸一杯足公等文字豪我
慚筆花禿願隨江月行扣舷和清曲

太史倚裝待發連日枉顧話別懇懇無已疊韻奉簡
北風江上來寒月照野屋薦土有昌黎愛僧如鄭谷擬上
北闕書還對南山菊花不受人憐詩成招我讀臨別重論
文夜遊期炳燭於意究云何字韻久未見示幽情暢未
足儻逢笑口開無礙吟髭禿行行重行行爲君歌一曲

庚申正月十三夜立春

笑語東風解凍遲立春翻在試鐙時老年無伴惟親火佳
節能閒且賦詩乞米書多因酒券買花錢半是香資諸天
雨灑蓮臺淨開到寒梅第幾枝

癡未能除早絕貪此生端合住茅庵豈無松竹梅三友祇
有詩書畫一龕瑞現曇花都是幻味尋諫果要回甘今宵
離共談風月默數星辰看斗南

嘉平月十九日寄懷竹莊觀察

一劍光寒山外山
半空星掛斗牛閒
江分九派東南去
雲在雙孤大小間
風雪更番傳歲暮
梅花消息動鄉關
石鐘曾有髯翁記
可爲參寥選韻還

李蓮生茂才以長句爲題小草依韻奉謝

修竹心虛堅有節
老梅骨瘦硬如鐵
乾坤清氣得來難
臥空山休漏洩
是空是色年復年
空中幻出雲霞煙
不恨生在千年後
但恨生不千年前
有詩可吟酒可醉
菩提卽是逃禪處
一朵梅花一首詩
萬箇吟身萬梅樹
李侯生有冰雪姿
傾心爲我題長句
李侯歌漫誇請將
此筆凌雲霞
不然署作護花使
願與仙人埽落花
君不見仙骨珊珊
身落落舉頭一拔
紅塵腳定有清風
振河嶽

答和李晴川宗伯見贈原韻

半生多愧一無能，況是雲堂退院僧。
花徑得閒仍自埽，詩壇相望幾人登。
但教心地明如月，何礙頭銜冷似冰。
曾製荷觴邀竹醉，名山風雨話傳鐙。

面壁能參文字禪，一花一石總清妍。
法雲珍重開初地，香火終須賴後賢。
自有洞天藏白鹿，本來居士屬青蓮。
投桃報李吾何敢，且結三生未了緣。

端陽前一日送官城太守之蜀仍步前韻

一官籌畫百重城，錦里猶來早著名。
騎鶴未纏腰萬貫，聽猿先下淚三聲。
且將酒醉端陽節，難得詩傳蜀道行。
儻是淮南遙問訊，爲言我輩獨鍾情。

庚午三月三日招諸大雅松雲精舍修禊集蘭亭字

契合形殊坐品賢臨風感事亦欣然一春流水懷今日萬
古人生騁少年有管無絃幽靜室左蘭右竹盛陰天連日不晴
清游長在初修地此外林亭況已遷

題雲谷上人梅花帳額有羅浮清夢四字

少年上人號雲谷不獨修慧還修福四大牀參明月禪一
團瓢借梅花宿梅花之氣清且幽無端思入羅浮遊羅浮
有約不能到佛在心頭莫遠求精藍曾是將軍宅何不種
梅伴老柏寺卽劉將軍故宅有古柏二株尙存其一暗香浮動影橫斜夢魂一
覺東方白

覺詮字性源上元人本性王主焦山定慧寺

人日雨用曾賓谷中丞爲揚州都轉時人日游焦山

唱和詩韻

人日登高閣窗含碧海煙雨留花外客春入水中天樹隔
層巖峭山開一洞圓蝸牛廬尙在高卧有焦仙

觀音崖晚眺

懸崖峭壁石玲瓏入竹穿雲一徑通行到別峯回望處半
江湖帶夕陽紅

顯清號謹庵天童寺僧有禪餘吟草

黃葉

連宵旅館聽秋風起卷疏簾眼界空一徑淡煙山寺外數
峯蒼靄夕陽中始知世態隨時變看到秋林豈昔同若過
聖湖新景地何須重問梵王宮

了亮字智水洛陽寺僧

詩話智水有詩名何子貞太史
游嵩山偕覽諸勝唱酬甚歡

松芝圖

懸厓一株松經霜復經雪倚澗五莖芝日月精華結生成
棟梁材品格自高潔異草本靈丹服之增顏色援筆入丹
青足稱兩奇絕

刈麥行

來牟異地穀種之在秋時歷冬復歷春刈當仲夏期雨雪
儻不足荒蕪致農悲今年尙豐稔始得療巖飢田家貴勤
儉天公不我欺

寫蘭石有寄

一片空山石數莖幽谷草寫寄風塵人莫忘林泉好
性慧字炳一號幻雲贛州人本姓黃主泰州光孝寺
寄劉石池

碧水情千里青山隔萬重故人棲隱地遙憶白雲封雪後
應鋤藥春來好課農相思託明月常照漢陽峯

送佛鐙上人之南海

自攜瓶鉢去萬里涉川程雪岸依帆轉春潮破浪行嶺雲
寒殿影海氣溼鐘聲徧禮名山後應知世念輕

圓能字西林號香雨興化人本姓張主光孝寺

送寶林回里

秋風瑟瑟啟行裝相送歸帆下楚陽出郭四圍蘆荻遠到
城十里芰荷香孤村野水添新漲細雨青鐙入晚涼客裏
閒情俱莫問好憑詩思寄滄浪

憶又儒弟

野水新添曲檻多無端世事悵蹉跎西風萬里歸人少明

月遙天一雁過祇爲壯遊羈瘴海不堪老眼盼山河心情已逐秋容減何日相期話薜蘿

明德號在堂秀水人本姓吳江都秋雨菴僧有二六閒情集

喜晤董海南

豈必曾相識新知卽舊知卻宜明月夜共讀謫仙詩話到三乘法稱予一字師來朝別君去再訂菊花期

定源字自律號乳秋別號又禪東臺人本姓黃有乳秋集

焦山同王柳村先生哲嗣小村作

策杖登峯頂天高秋氣清雲山相別久花鳥不知名木落江樓聳潮來海月明竹窗留客處四壁響蛩聲

覺燈字秋屏主焦山定慧寺

自題小照遣懷

昔爲行腳客負笈辭故鄉三參海門國一度蓮花洋蓮花
洋接光熙頂去尋梅福燒丹井綠搖海水與天浮一洗年
來詩夢冷攜筇復向雙峯來樓閣不勞彈指開夜有魚龍
妬高卧洪濤激石如奔雷我住焦巖今五載楊岐事有幾
人解江頭孤月此心明蒼狗白衣時見改遠公淨業與誰
修空山獨立愁復愁流光似水去若此漸覺霜花白上頭
祖觀字覺阿元和人本姓張名京度字蓮民諸生住通
濟庵有梵隱堂詩存

詩話覺阿事母孝母歿遂薙髮爲僧本出土流贈於
次采一時吳越壇坫相爲引重名亞六舟有題明路
王畫蘭石刻長歌具體
梅村亦繼流所罕觀也

鄮山育王寺度歲作

簞船載雪渡江行一路看山到四明
聞道甬東眞佛地試尋啞女話無生

鄮山頂湧法王臺窳堵光明寶藏開
識得摩尼本無相塵塵剎剎見如來

徧界香雲雨寶華吉祥勝地布金沙
神仙只有陶貞白親向雲臺受木叉

白牯狸奴語太顛今朝頭痛怕談禪
誰將龐老西江口吸盡巖前妙喜泉

石門文筆費才思五字寒山是我師
一瓣旃檀一杯水長明鐙下祭新詩

答胡子瑩見贈次韻

爲道無近效立志當遠期一念不自覺流浪遂及茲迅風
鼓識浪苦海浩無涯勉修嗟吾晚力學如君希索居苦無
侶悵悵將何之相期神明閒道合無睽離念念薪火改步
步人羊悲孤明衆垢蝕獨往羣撓隨無爲墮埴者冥行失
所依

金山雜詩

享盡清閑賣盡顛兩年未算草鞵錢殘書破硯參堂去我
是窮酸杜撰禪

歇得狂心便了因談玄說妙亦欺人眾中誰是元枯木萬
仞懸崖忽放身

未了叢林粥飯緣生涯分付鑊頭邊擔柴運米尋常事壓
損詩人山字肩

打頭黃葉溼禪衫
梵放尋秋百尺巖
日落高臺數飛鳥
紅泥殿角過風帆

滿堂龍象足師資
世外論交喜可知
最憶焦山借庵老
荒年忍餓坐談詩

孤鴻嘹唳宿汀洲
衰火星星辨客舟
夜半風鈴淒不語
江聲吹月下僧樓

笛咽離亭斷客魂
峭帆東望海天昏
老僧笑指風濤險
坐看江山不出門

胡子瑩同趙艮甫過訪金山艮甫有詩見贈次韻

我愛浮玉山秀出
瞻部洲蕭然寄瓶鉢
轉瞬夏已休滔滔
大江水日夜東向流
潮來塔影動孤根
勢欲浮故人白下
歸暫聚忘宿憂
浮生旦宅中出沒
等海漚一器集蚊蚋
六

窗喚獼猴此身不自有微名復何求江樓過鴻雁起看天
地秋紛紛孝廉船門外帆初收

趙君不羈士詞壇推宿學胡子曠代才妙悟超等覺嗟予
如鈍金久已退芒角面壁楞伽臺龕經注梵軸豈能絕形
累聊以洗心濁悠悠身後名腐甘同草木良朋聚首難歡
諧謝拘束邈哉獨鶴聲安用候蟲續揮手問歸程離愁滿
林麓江天萬里秋孤舟何處宿

春日卽事

江邊新漲沒漁磯滿路楊花撲面飛海燕初來風漸暝河
豚欲上水添肥西山游騎青絲轡南陌春人白袷衣只有
枯禪愛閑寂尋芳無客叩柴扉

神仙

丹雘荒唐下玉京九霄鸞鶴幾時迎山中宰相言符命
背神仙話太平游戲金門空作達摩拏銅狄未忘情侍郎
碧落頭銜重天上人間盡好名

贈王子春

亂離蹤跡各飄零山寺重逢鬢已星醉後談兵雙刃白愁
來說鬼一鎧青側身人海成孤往觸目狂泉笑獨醒寂寞
草元嗟歲晚問奇誰過子雲亭

贈顧芷塘

笑傲山林遠市城翛然物外世緣輕繩牀經案王摩詰僧
帽儒衣顧阿瑛滿院樺香無隱爾一池水皺不干卿何當
飽喫黃精粥茅屋三間了此生

錢水西藕花香裏讀楞嚴圖

茅屋三間淨埽除藥鑪經卷老僧居自從一見楞嚴後不
讀人間糟粕書

蕭然一衲坐繩牀虛室常明海印光選罷耳根參鼻觀木
魚風定蕩花香

自笑

自笑平生半黠癡觀河羞見鬢如絲亂離始識承平樂少
壯何知老大悲避世桃源彭澤記感時天寶杜陵詩五湖
不少閑田地一棹煙波信所之

了禪字月輝盱眙人本姓雷主定慧寺有留聲閣詩鈔
詩話咸豐三年寇陷鎮江金山北固相繼被火月輝
約諸僧誓以死守聞官軍至圖山因遣人往導水師
得乘風奮擊駐山扼守
殿宇寮房皆獲保全

贈九華山几谷上人

上人高卧處不與眾山齊庭樹唳歸鳥巖花獻野麝泉從
簷際落月到榻前低妙悟禪那意青雲自有梯

再寄九華山几谷上人

九子山頭月雙峯頂上雲清芬同一派孤靜兩無分畫筆
超流俗詩才迴不羣我來應下拜古佛最能文

感成

本是無心客緣何百感生不空人我見難斷俗凡情舊雨
愁中散新詩夢裏成莫言書嬾寄十月未休兵

未識亂離苦先驚魂夢安親知存海內孤立在江干戀放
輕三宿齋難飽一餐飢寒余領慣蒿目淚空彈

似我拙身早還遭寇盜侵度人無妙術濟世負初心恨少
橫江鎖慙無布地金應須修淨土結社繼東林

客中寄本山諸友

時住一粟禪林

上方借得一枝棲雲自相依鶴自隨見月未忘禪在指談
經想像佛低眉騷壇白雪容賡和故國黃花怨別離參透
乾坤同一粟蒲團獨坐夜深時

小雲山房與祇菴長老夜話

金鐙一盞傍維摩此夕歡迎老夫過初地煙霞知己少五
更風雨落花多江山如畫詩難續醫藥逢緣病可瘥我是
黃梅門下客敢將衣鉢問如何

自成號蓮溪江都人本姓方翠屏洲菽秋菴僧

登瓜洲彤雲閣追憶王漢標先生

閣爲先生重建

窗俯大江流西津入檻流山光來蒜嶺樹色入瓜洲百戰
人何在千年閣尙留臨風懷子晉應跨鶴來游

橫橋

橫橋拂柳絲春在畫圖裏終日送行人只有橋下水

大須字芥航鹽城人焦山僧

詩話芥航伍佑場儒家子以父病祖母命其捨身年十二祝髮參焦山爲了禪所賞囑其師長流付以法遂繼席焉工詩善畫蘭竹

暮雪

日夕北風緊寒林噤暮鴉是誰談佛法眞箇墜天花呵筆難臨帖敲牀且煮茶禪關堪早閉應少客停車

寄懷蔣賓梅先生

明月照空廊思君夜正長遙知百里外同此九回腸淮浦何時去天涯有客望好詩須寄我舊約莫相忘

退院口占

十四年來了宿因，捫心尙不失天真。徜徉山水成初願，守護煙霞得替人。百八摩尼無量佛，三千世界自由身。寄言江上乘風客，莫待昏黃始問津。

聖教字友藁號寄巖甘泉人本姓盧焦山玉峯庵僧有懶餘吟草

步東昇樓壁間韻

信有離塵境，登臨共把杯。潮平江水闊，日出海門開。勝地多名蹟，吾生愧不才。偶緣尋道侶，鴻爪印樓臺。

東洲秋夜

尋詩隨步出前楹，寂寞空齋欲二更。皎皎襲人寒，月色瀟瀟似雨暮。秋聲西風落木愁，偏起永夜鳴蟲感。易生小住莊廬動歸思，雙峯咫尺夢難成。

微凡字寄雲有募梅精舍詩存

詩話寄雲越中詩僧與李越縵周東渥
孫蓮士王孟調諸人唱和故緯有風調

次韻東渥太史雨窗寄懷

秋風起江村秋煙滿庭戶幽人生遠懷寂坐一窗雨掌中
杯未斟膝上琴先撫目送天際鴻飛飛沒雲樹

題畫蘭

彼美在空谷離立含冰霜地幽作花早春風生古香盈盈
一澗水孤客遙相望不采何忍舍采之用無方願得贈之
子佩以羅綺裳中道勿捐棄千載留芬芳

和季貺寂寂原韻

林坳深樹不知門寂寂齋居避客喧貧到亂離都作達道
能憂患更稱尊住山長策書千卷遺世高懷酒一樽除是

縱游巖壑興行蹤不出水雲村

偶成

飽喫香廚嫩蕨芽也憑無事讀南華
紙窗一綫春風入吹落瓶中供佛花

昌仁字一庵勞山華嚴院僧有唯心集

尋梅漫興

指月拈花總是禪悟來原不落躡筌
有人問我西來意花在枝頭月在天

聞鐘

但聽雲外鐘不見雲中寺松下問樵人
遙指雲深處含澈字雪堂新繁人龍藏寺僧有緣天蘭若詩集

詩話雪堂風雅好事縣中費此度父子
詩集至光緒間始編次刻行雪堂力也

螺園訪林濤如適梅花初放有詩見贈次韻

螺園冬日我來頻絳帳梅花報早春寒氣化爲香雪海高
風清似玉堂人言歡有累煎茶碗感舊無煩漉酒巾寄與
程門諸弟子莫將熟客認嘉賓

靈照嵎縣人本姓鄭名淦字森泉光緒戊子舉人官和

州州同永嘉頭陀山妙智寺僧

詩話森泉辛亥後棄家爲僧殆金道隱方藥地一
梳人而其詩雅不欲以遺民自居偶平意遠矣

答冒鶴庭

廣生

隨緣披剃禮空王頑殼猶能自主張我祇愛嘗蔬筍味人
偏疑戀薝蔔香向生游嶽從憑弔杜老憂時念拜揚隱顯
胥關天位置世間何事苦評量

恥學鄉賢梅市卒嬾隨丹士葛仙翁愛佳山水來名郡稱

老苾芻作寓公貪嬾謀新符俗諺

越諺有曰貪嬾倣和尚

度生術乏

負宗風齋魚粥鼓還朝夕慙與當年竊祿同

敬安字寄禪號八指頭陀湘潭人本姓黃湘陰法華寺

僧後居京師法源寺有八指頭陀詩集

詩話寄禪幼就塾受僧論未終篇出家後嘗省舅氏至巴陵登岳陽樓諸人分韻賦詩寄禪獨疑神跌坐忽得洞庭波送一僧來之句歸述於人咸謂有神助遂發憤學詩用力甚苦至忘寢食然拙於作書詩成輒倩人寫之一日作詩寄李炳甫有花下一壺酒句書至壺字忘其點畫因畫一酒壺於其間見者無不絕倒晚年學齊梁人文體亦古雅有法所謂文字般若者非耶

泊空舲巖上杜公亭

杜老留題處征帆又此停水痕侵岸白嶽色向人青
檣燕飛何處江猿不可聽竭來一憑眺落葉滿空亭

暮秋偕諸子登衡陽紫雲峯

紫雲最高處飛錫共登臨
秋老山容瘦天寒木葉深
西風孤鶴唳流水道人心
坐久林塘晚寥寥鐘梵音

答尹和白

鎮日焚香禮翠微
松花落滿水田衣
柴門寂歷生幽草
除卻孤雲客到稀

送海峯上人行腳

南詢從此始煙水浩漫漫
一鉢飄然去千山次第看
江雲春樹碧海月夜鐘寒
處處隨緣住無求夢亦安

將之南海賦別

舊院安禪處經年錫一臨
欲辭溪澗水去聽海潮音
白髮憐師老青山悵別深
空門本無我那有去來心

瑪瑙寺懷古

生公講
經處

地僻雲深少客來
梵王宮殿盡塵埃
淒涼一片西湖月
猶照生公舊講臺

訪育王心長老作

行行不覺遠入谷
已殘曠松翠近可掬
泉聲咽更聞水清
魚嚼月山靜鳥眠雲
寂寞雙林下煙霞長
屬君

與與了上人話舊

當時楚水嶽雲間
持鉢從游鬢未斑
一十二年如電拂
白頭相對話岐山

過徐酤仙故宅

酤仙鄞人善飲工書自號四明醉客

門巷蕭條長綠蕪
流鶯猶似勸提壺
野棠含雨梨花白
不見高陽舊酒徒

送元松上人還日本

滄海渺無極鄉關何處邊歸帆遙向日島樹遠含煙洗鉢
鯨吞水窺齋鳥入船此行應不負了悟大乘禪

自海上歸與本師雲和尚夜話

不侍巾瓶側恩恩已十年早知布毛意何用草屨錢夜雨
談詩坐孤鐙對榻眠別來多少事語罷欲潸然

喜曾重伯陳伯濤見過用伯濤見贈原韻

茶話日將夕虛堂聞梵音道根俱不淺靜理亦何深貽我
郢中曲勞余塵外吟誰能一彈指了悟去來今

是法無高下誰分大小乘水雲天漠漠身世日騰騰白髮
愁難卻青山歸未曾聊將松頂月分作佛前鐙

幽寂雨華寺禪宗眾所歸雲生游客屐花落講僧衣大覺
看身妄元談入理微上方鐘磬裏惜別語依依

秋夜懷王伯諒

秋夜不能寐秋蟲鳴砌間疏鐘雲外寺落葉雨中山以我
意不適想君情倍艱何時復相見一笑破愁顏

碧湖亭晚眺

會春園裏亂棲鴉佳宴堂前日影斜洗盡繁華一湖水野
風吹放白蓮花

贈璧臣居士

繁華事散鬢如絲萬里青山獨往時一種風情誰得似嶺
南爭唱荔支詩

君有尊前聚散多萍梗嶺外風情祇荔支向爲人傳誦

登金山留玉閣

高閣一憑眺蒼茫太古情天疑入海盡潮欲挾山行芳草
金陵渡斜陽鐵甕城鄉關杳何處向晚客愁生

贈吳雁舟

獨有延陵子精廬每見過禪機信敏捷綺思未銷磨偶看
楊枝舞爭傳桃葉歌天花紛落處誰識病維摩

春草

年年原上望惟汝獨先榮已入西堂夢重傷南浦情燒痕
看漸沒屐齒踏還生春色又如此王孫尙遠征

四月十六陪茗香翁湘綺先生泛舟碧湖

勝侶忽相引扁舟泛碧湖江山今古在身世水雲孤快樂
自清妙禪心甯有無愛茲泉石好還約飯秋菰

登空冷巖和杜工部次謝靈運七里瀨韻

舍舟運神游登棧眩奇眺洲渚屢旋複巖石咤危峭雲竇
滴餘潤洞隙納微曜鑿險若神工履陰疑鬼嘯遺物奏元

功觀空得要妙既愜青霞心豈顧白衣誚黃屋羅英靈滄
洲隱漁釣取舍各有宜殊音自同調

舟中呈寶覺居士疊前韻

運心恣冥游流目縱遠眺浮杯歷滌洞攀蘿陟奇峭客塵
方外遺神光發內曜既杜崑耶口亦薄蘇門嘯辯河息諍
訟理窟得元妙南嶽爲我湧北山豈余誚四海納微漚六
鼇歸一釣請謝河伯言爲君彈此調

清涼寺呈本師

達人貴宏道獨覺非所論覺花馥心地智水湛靈源誓然
大智炬永破塵沙昏拂衣舍衛國開講給孤園豈不疲倦
梁彌憫四流奔喬嶽蘊靈異中有甘露門非賢豈能主惟
德眾所尊人天一忻悅花雨何紛繁迦葉信小果慶喜慚

鈍根荷法各有任嘉會何由敦聊勉自化志庶用酬慈恩

山行

山行既曠遠望茅茨隱約林表援蘿上一道者出貌甚癯揖余入具野蔬共啖不交一語禪誦

自若時斜陽告夕皎月在窗輒題數句以娛良夜

松風始微動山鳥猶未鳴有客資神往高詠發幽情荒塗
莽荆榛樵牧亦罕經靈源窮欲盡忽聞雞犬聲道人歡客
至佇立候柴局設食羅野蔬志意殊真誠曖曖陽已微皎
皎月孤明心境兩俱寂泠然契元冥

謁黃庭觀

偶乘獨往意來謁魏元君谷黯松杉合天清鸞鶴聞靈芝
含秀色仙石繡苔紋坐久諸緣息晴空生片雲

望廬山

縱棹隨神風浩蕩洪波間引領望廬嶽悠然開心顏秀色

信難名靈氣吐自然五峯媚雲表巉絕誰可攀緬懷遠法師高步太元年陶謝尙返駕澄什甯比肩千載沐餘潤猶能洗塵緣瞻霞想神足臨流哀逝川元棲儻可必妙蘊當能宣

九華山

九華實仙都重巖蘊神宅弭棹倦驚濤瞻雲慰良覲遠抗廬霍高兀若星辰偃霜壑流曉丹秋巒散遙碧遠近生異容天山共一色伊余慕肥遁逢山愜幽寂徒眩耳目奇未就煙霞息思欲御冷風曷由生羽翼元關甯我局靈境冀孤厯

中和日與程曉園過東洲講舍邀雷小秋羅雲巖廖
卓夫姚瑞磨游小羅漢寺作

春風一微扇草木含新蕢佳茲微雨晴復與賞心攜鼓枻
溯洪流揚帆便輕颺洲渚綠方盈霞彩垂光儀講肄集羣
彥矯矯鸞鳳姿蘭蕙馥其馨德義爲之基洙泗若可接孔
墨道甯疑其美紺園游同禮天人師明鑑皎智饒覺樹聳
高枝境幽性所愜理勝情無疲良辰勿可諼傾耳希新辭
夢登岳陽樓觀湖中大雨作

天地忽異色元陰合一湖迅雷翻地軸高浪蹴天衢風雨
作還止魚龍喘未蘇但令膏澤徧何敢怨泥塗

雷池晚眺

層巒忽已暝稚子語煙深欲問入山路惟聞流水音閒雲
不出岫倦鳥自投林萬古雷池月冷然鑒我心

贈漱石和尚

漱公法門舊頭白卧青岑借問看雲意能無出岫心煙蘿
身外滿歲月定中深不動廣長舌松杉演妙音

高臺寺觀念庵松

高臺寒雪曉相過愛看松枝掛碧蘿珍重枯禪勤護惜念
庵手植已無多

謁裴公墓

裴公塚對南軒墓祇隔秋雲一片山松徑巖扉俱寂寂幾
回蘿月悵空還

湍山水牯牛頌

識得湍山牯林閒任自然身毛亦將白鼻孔也曾穿牧笛
斜陽裏閒情野水邊一犁微雨足不負祖翁田

詠白梅

了與人境絕寒山也自榮孤煙淡將夕微月照還明空際
若無影香中如有情素心正宜此聊用慰平生

贈尹山人和白卽題其陰符經註後

胸中邱壑一塵無人海茫茫意自孤門巷蕭閒苔蘚碧滿
庭風雨註陰符

霞外神情誰復知蒼蒼鬚鬢已如絲春風落魄長沙市錯
被人呼老畫師

送陶觀察森甲之姑蘇

春波如鏡草萋萋十里垂楊綠映隄借取祝融峯上月送
君直下洞庭西

憶明州皈依長老

太白峯前聽法回寒梅二十度花開何時七塔橋邊寺重

禮明州布袋來

晚晴移詩匯卷一百九十八終

晚晴移詩匯卷一百九十九目錄

女冠尼

神一七首

玉京道人一首

曙光一首

曹素侯一首

草衣道人四首

曇道人一首

嶽蓮一首

以上女冠

靜照六首

道元一首

再生四首

來季奴一首

無垢九首

法鑑一首

德容十三首

超一二首

安生三首

介石二首

性道人十四首

上鑒十首

吳氏一首

行剛一首

德隱七首

維極

一首

超越

一首

明萱

四首

元端

一首

石巖

六首

妙慧

一首

妙惠

一首

寂居

一首

靜諾

十一首

僧鑒

二首

靜維

七首

傳正

一首

智生

五首

德日

十二首

德月

十三首

悟情

二首

宛仙

一首

翁氏

二首

智圓

三首

妙霓

一首

明修

四首

心中

六首

摩淨

一首

鏡明

二首

慧機一首

以上尼

晚晴簃詩匯卷一百九十九

女冠尼

徐世昌

神一字荆隱一字龍隱華亭人原名淑吉字美南明吏

部考功司郎中夏允彝長女嘉定侯洵室有龍隱遺

草

許話龍隱善琴工奕于歸後年二十一而寡撫周歲孤榮明亡其翁之兄嗣曾及子演潔列難允彝亦自沈後其翁岐會復以株連被逮死母龔赴水死龍隱夜艤舟潛往棺斂遣人問行求其翁屍於雲間初岫會季子壽亡命有司名捕之岫曾季子就挺身以代其妻適死於上洋龍隱稱貸營救抱其子榮撫之事稍平孤榮才而歿龍隱曰吾數年來三百六十骨節交付太虛更無繫戀矣康熙壬寅卒諸書有言其視髮為尼者冒青若婦人集集補稱為女冠今從之

悼亡

蕭蕭鑒元夜幽室生微涼眷言念君子沈痛迫中腸音微

日以杳翰墨猶芬芳靈帷空蕭條齋奠直荒唐舉聲百憂
集泣涕不成章

夢游天台

石梁飛度接花茵殿閣經行覲勝因香氣入衣初不觸鐘
聲到耳迴無塵木童石女賓中主翠竹黃花覺後身憶舊
臨風三歎息碧潭明月影磷磷

二月雨雪同靜維招南樓至曹溪忽得膠城家信卽
事感懷兼寄再生

尺素頻傳慰草萊謝亭非復舊池臺彤雲未許蛟龍奮琪
樹甯辭鸞鶴來黃竹歌聲遙彷彿玉壺風色好徘徊落梅
深處無人到脈脈心期更幾迴

憶王庵舊游寄再生

人生聚散本浮漚回首蒼茫感昔游曉露未收花力重午
陰欲定鳥聲幽聞香小坐忘塵世步月清言掃舊愁梅影
橫斜應似畫殘英滿地有誰收

重過橫雲山懷靜維

翠竹丹崖倚碧流輕橈重撥意悠悠山靈未許同招隱畫
棟飛雲鎖上頭

閨思

碧天明月影遲遲翠袖輕寒香露滋海內風塵勞客夢江
東羅綺擅文辭頻驚桂棹迴前渚時整花鈿立小墀子夜
明鐙猶未寢魚箋珍玩感婚詩

六姊孫儼簫授於丁亥家難爲賦一詩

憶昔于歸紈綺叢卽家聲譽擅江東肅雍自叶房中樂散

朝仍歸林下風日暝畫樓彤管麗春深珠箔麝蘭通綵雲
散後空憑弔野哭荒郊恨幾重

玉京道人號雲裝上元人卞氏女原名賽

詩話玉京工書畫善鼓琴繪蘭愛作風枝嫩娜一落
筆罄十餘紙間作山水喜著女子象欸署畫中人初
越樂籍年十八游吳門居虎邱之山塘尋還秦淮遇
亂復之蘇逾兩年游浙後歸東中一諸侯不得志遂
乞身入道嘗言吾在秦淮見中山故第有女絕色名
在南內選擇中未入宮而亂作軍府以一鞭驅之去
故吳梅村聽玉京彈琴歌有云中山有女嬌無雙又
云依稀記得祢與阮同時亦中三宮選可憐俱未識
君王宮府鈔名被驅遣樊樊山有宏光三宮詩和
作甚夥以漢陽周退舟貞亮爲最博雅附識之

題自畫小幅

沙鷗同住水雲鄉不記荷花幾度香頗怪麻姑太多事猶
知人世有滄桑

曙光上元人胡氏女原名朝霞有紅于詞

詩話曙光舊隸樂籍善歌舞後爲女冠錢牧齋有詩
其一云黃閣青樓盡可哀曉妝墮髻倚低徊莫歎烏
爪麻姑少曾見滄桑
前度來爲曙光作也

送人

秋風江上送君舟落葉江楓總別愁解纜不知人去遠憑
闌猶倚夕陽樓

曹素侯長洲人

詩話曹素侯秋日詩
云據此才思或亦魚元機一疏

秋日

梧桐一葉早驚秋鶴夢留人塵夢收情逐綺雲飄玉宇心
隨碧落蕩銀鉤浪游清院難消日偷上層樓未敢愁空憶
舊時衣帶緩不勝遙夜淚重流

草衣道人字修微揚州人王氏女有遠游篇開草期山

草

詩話修微七歲失怙事母孝不沐浴不奉母殯未知
父葬處涕泣命刺血書經餽于僧於廣陵作水陸
大會卒感異夢得父骨嘗往來西湖邀游楚粵急人
之困揮數千金無所吝惜工畫山水花卉好金石適
太僕許譽卿後爲女冠

重過雨花臺望春江有感

春姿靜東岑雲影結遙燦坐覺高臺空不知翠微半落花
自古今嗟鳥變昏旦撫花良易遷卽事聊成玩況乃晴江
開綠波正拍岸

舟次江幹

一葉浮空無盡頭寒雲風切水西流蒹葭月裏村村杼
蟀聲中處處秋客思夜通千里夢鐘聲不散五更愁孤踪
何地堪相託漠漠荒煙一釣舟

冬夜

獨坐渾無語含顰應有思私心自不寐何事倩君知

秋日閒賦

露寒殘月上蒹葭近日離魂未有涯寂寞經年人不見空房夜夜數歸鴉

曇道人字靜婉金壇吳氏女蘇州木犢人女真祠女冠

詩話靜婉甫字而夫歿家居宇志父母相繼逝遭明末兵亂避居木犢香水溪上以女冠終宋牧仲題其門有一自春風停彩仗至今今夜有丹爐之句

別思

西崦雨未收東崦風又作留住綠蓑衣莫與篙師著

嶽蓮一名淨蓮字韻香無錫人王氏女有情芬精舍小

集

詩話韻香少為北邱尼年十九蓄髮為女冠居慧山
 福慧雙修菴號玉井道人又號清微道人能詩工小
 楷善畫蘭竹妍靜疏朗別具風格有說竹四十八則
 空山聽雨詩嘗倩鶴鵲散人為作空山聽雨圖一時
 名流題詠殆徧都五百餘家後圖失去復倩瑞芳主
 人補寫一圖續題亦數十家光緒初番禺葉蘭臺衍
 蘭曾摹韻香小象道裝執拂蕭灑出塵袁氏藏宋槧
 魚元機集有韻香跋書法如簪花美女援鏡照春丹
 徒丁閣公傳靖搜訪韻香事蹟輯福慧雙
 修菴小記一卷於諸家紀載彙錄頗詳

自題畫蘭

十分珍重護芳叢意在忘言淡蕩中塵外天然見標格肯

隨桃李嫁春風

靜照字月士宛平人曹氏女

詩話月士為明宮人甲申之變隨內監劉至南京順
 治乙酉後視髮為比丘尼作宮詞百首又有女尼妙
 音亦舊時宮人國破後出居民間視髮於北城文殊
 菴與海昌相國居址近常出入相國家談宮中舊事
 及甲申三月事甚悉言十九日夜漏欲盡先帝獨召
 內人命共出宮避賊是時黃霧四塞對面不相見帝

泣下沾襟六宮皆大哭又言宮中侍姬都以青紗護
髮外施銀釧自遭喪亂香奩寶釧悉爲人奪惟存青
紗數幅猶昭陽舊物也見陳迦陵婦人集吳漢槎白
頭宮女行有手執金經淚暗流云是前朝舊宮女之
句

宮詞

到面東風只自知燕花牌子手中持椒房領得金龍紙勅
寫先皇御製詩

一樹寒花冒雪開幽香寂寂映妝臺女官爭簇傳呼近知
是鸞宮選侍來

寶妝雲髻鞦金衣嬌小丰姿傍玉扉新入未諳宮禁事低
頭先拜段純妃

口勅宣傳幸玉熙樂工先候九龍池裝成傀儡新番戲盡
日開簾看水嬉

閱徧司農水旱書君王減膳復齋居御廚阿監新承旨來
日羹湯不進魚

儉德慈恩上古稀他方織錦盡停機赭黃御服重經濟內
直才人著布衣

道元陳留人王氏女

詩話道元爲明宮人選難清修不廢吟詠其禪坐書
懷一律冒青若稱其流麗今誦之殆有天上人間之
感也

禪坐書懷

碧雲靜鎖梵王宮猶似明霞拱禁中玉樹舊枝歸淨業內
家新調擅宗風三千里外腸堪折十二年前淚暗紅欲悟
無生何處是禪鐙移照鏡臺空

再生長洲人姚氏女原名嬌字靈修有再生遺藁

詩話靈修爲文毅公女孫謹言笑善
詩文適侯生演演從父死遂入空門

早春卽事

煙鎖虛窗展素緇微風吹到落梅香孤懷待月惟枯坐餘
恨添眉卻晚妝舊事不堪重省憶新詞漫自費平章黃梁
一夢從今覺願息塵機禮法王

不寐

殘鐙一點蕪孤檠門外蕭蕭落木聲風動庭梅疎影亂露
凝修竹暮寒輕支離瘦骨惟供病牢落愁懷豈爲情此夜
酒醒魂斷處半簾明月夢無成

仲春十五夜大人山中言旋卽別寫懷

白雲天末和愁低無限離懷怨曙雞煙柳河橋殘月小疎
鐘古寺曉風淒百年幻影花枝老二十浮生草路迷一輩

江頭如可折，竺乾西去待相攜。

寒夜書懷

寂寞青鐙夜未闌，半生心事獨盤桓。
煙波縹緲魂非遠，人事悲涼歲欲殘。
素志應同明月皎，離情還共白雲漫。
良宵剪燭歌行露，松竹蕭森起暮寒。

來季奴蕭山人海甯白衣庵尼

詩話：順治初，周司檢橋時有土匪，劫奪季奴過之，賊遂劫季奴出，襍中刀五寸許，直前擊刺，斃二人，追殺逃者三人，因自首縣，縣官搜捕餘黨，盡戮之，民賴以安。見花溪補志。

同洵芳航海作

濁浪翻天地，微軀付海風。
恨他精衛鳥，銜石竟無功。

無垢江蘇通州人，陳氏女，原名潔，號石香，同州孫安石

室有茹蕙集

陳迦陵曰無垢幼博學詩文絕工著有繡拂齋集嘗
作閨怨五言詩有夢去不關愁曉來心自惡之句從
叔文起見之

屢形吟賞

詩話石香無子與夫不相得乃歸母家久之落髮卽
其祖所謂鴛鴦堂者事焚修下帷著述語多悽惋晚
歲益貧至併日食累月不起起覆水窗前墜樓死

書懷

青翠入簾櫳永日駐幽閣愁繁芳草生靜覺桐花落奩鏡
網蟪蛄庭柯巢鳥鵲夢去不關愁曉來心自惡獨坐只書
空微雨益蕭索

雪後登山

滕君似妒青山翠萬里峯巒鋪玉碎蒼涼四望野雲低江
天靜與茅亭對此時誰是景中人王恭鶴筆難爲繪我愛
江天積雪幽朗吟雪賦寄中流長江寂寞魚龍沒坐向孤

寒月影浮

揚州早雁

纔離塞北忽江東
嶺岸蕭疎樹未紅
數點雲間誰繫帛
一行天外自書空
安棲邗水猶鄉土
遠過迷樓感故宮
別有孤鳴沈別浦
高風欲借起泥中

秋柳

弱不禁風素自憐
黃昏細雨斷疎煙
樓頭指冷誰吹笛
塞上身單欲寄綿
一任嘯烏翻子夜
直須飛雪送窮年
攀枝信墜英雄淚
殘照蕭條灞水邊

悼小婢素梅

年只十齡餘幽花色亦如憐伊
明慧甚獨遣理琴書
以疾性逾潔時時拂卧牀
猶然覓芳卉斜插髻雲旁

每識予悲歎溫言慰寂寥深期共朝暮何事彩雲飄

玩月

秋氣晚餘寒清光萬里寬天風如可借吾意欲乘鸞

春閨

院冷梅花玉翦疏晚風偏助落花愁侍兒知我無情緒不
把珠簾上玉鉤

法鑑杭州人自署西泠比邱尼

丁未仲冬攜鉢渡江喜過深翠山房巢民先生出小
影索題賦贈

人龍文虎玉精神寫出當年抱膝身李郭久知天下士衛
荀重見六朝人花藏僻巷車常滿竹引仙齋鶴自親最愛
白雲無世態我來亦爲一通津

北月集言原卷一百一十一
德容嘉善人朱氏女原名又貞同縣張我樸室有璇閨

詩猗蘭幽恨歸雲等集

詩話德容事親孝年十五適張唱酬甚衆後張爲科
場所累全家發遣德容辭請捐軀贖罪少延姑舅殘
年後爲尼其泣懷
四言詩原委略具

泣懷四言詩

魏里我朱世稱名德父舉孝廉儀型南國先慈割股善爲
內則八兄二弟甲科連捷猶子繁衍勤書晨夕父半百年
始生又貞弱女非男訓護慰情稍讀經史志古閨英十五
而笄清河于歸十五遵教姑嫜是隨操持佐饋夙夜無違
熊羆三夢今始一垂絲林不靖湖渚鋒鏑囊爲盜齋牛衣
相泣良人砥志下帷屏跡瑤章珠賦聲動都邑戊子之秋
幸宴鹿鳴長歌遠寄鄭重前盟壬辰登第筮仕廷評繼美

釋之張先後稱丁酉維夏泛舟來都相敬未暝旅魂乍蘇
忽令分闈校檢羣儒維我夫子能文有恥秉矢公明冰寒
立志上嚴功令下畏多士勤慎勿懈月餘竣事豈知同案
貪心敗類庸違象恭實懷狂悖羣凶飛語如霾如雪緹騎
在門去不及訣五毒倍至百喙莫雪事若風影罪不例律
嚴行示懲西市引決禍起黨同古今一轍余念致命割血
流裾九闔間隔囚安上書七人同盡遑辯真虛家產寥寥
雞犬盡沒桑榆老親亦旦暮活相逐邊塞念此神奪求榮
反辱遂付剃髮繡衣永訣袈裟相接拔幽報存叩金經力
嗟乎薄命家鄉萬里身獨羈囚飢寒泣涕南望白雲淚零
待徙不如鳥雀去來迤邐我思刑書國之鉞斧虛實按情
輕重有故雷霆振聲頃刻雨露同罪諸臣悉蒙恩宥嗟我

所天先受刑苦聖人刑法萬世則祖雷不崇朝豈忍終怒
用法有律手足乃措皇皇百執矯矯直臣一夫不獲亦疾
于心有此沈寃充耳不聞折檻回天祐我後昆夫縱有罪
死卽平允老親斃獨周文所憫茫茫塞北坎坎艱屯行同
飄蓬到亦顛殞枯窮至此死之安忍

惜籠中鳥自喻

千里朝風唱和遙誰憐孤鶩禁樊牢貞心甘守籠中日再
世齊鳴共九霄

梅花

蝶夢三春淚落花風飄餘粉謝鉛華天生玉色菩提片疎
影幽窗獨自誇

茉莉花

冰姿玉骨淨塵煙南國攜來種自妍
花史高名空第一只今誰識藐姑仙

對良人小像泣感

對影依稀恍若君欲言不語怳慙慙
稱觴舉案惟形筆賴是相逢畫裏人

七夕

玉露金風報素秋穿鍼樓上獨含愁
雙星何事今宵會遺我庭前月一鉤
織女牽牛送夕陽臨看不覺鵲橋長
最傷今夜離愁曲遙對天涯愈斷腸

秋色有感

征帆慳悵帶秋風客路愁思旅況同
無限憶君傳織錦有

情長寄白雲空

昨別離魂不覺愁鐘催殘月憶悲秋思君空館應無語南
望多情似水流

憶母

拜別慈幃一月餘堪憐弱質遠驅馳北堂萱草今安否但
願棠荆好護持

憶兄

蛾眉愧不列鬚眉未得吹簫恰古徽况復孤舟人萬里脊
令原土白雲飛

憶姊

姊妹花開種繡房徐娘空復字秦郎愧從四女祠前過膝
下而今少一行

憶兒

坐憶雛兒淚滿裳天涯一望水茫茫
臨行珍囑休懸念多識之無字幾行

超一揚州人殷氏女

詩話超一早寡參禪王漁洋稱其學道三年一朝坐化固宜另通了徹見之於詩也

遺詩

靜中無箇事反復弄虛空地老天荒後
魂飛魄喪中有詩開道統無法度愚蒙
忽底虛空碎夕陽依舊紅

看花

土來澆灌水來栽顛倒工夫任我來
滿院春風花自語不將顏色向人開

安生吳縣人洞庭山水月菴尼

詩話安生能詩工琴及年二十一
十卷中舊有遺象意態莊嚴

詠蠶

甕蘭空傳異人衣豈誑天只應方老病

放翁詩衰病今如作繭蠶

未合

喻參禪

傳鑑錄坐禪蠶吐絲自縛

死去悲絲盡甦來羨翼全本無鱗角

勢雪覆亦徒然

朱夫人惠碧螺春

綠潤涵靈氣清芬帶露華翠微新雨歇雲竇古根斜沸鼎
看魚眼擎杯吸乳花多君緘贈我應自勝流霞

輓旃那

玉容從此謝空華小閣游絲護碧紗宛轉曾遮松下扇清
幽誰供佛前花蒲團初撤憐春月貝葉空遺映晚霞幾處
香溫悲平澤青鞋倚壁冷袈裟

介石上元人尤氏女原名瑛字鍾玉有春水舫殘橐

詩話鍾玉本秦雅舊院中人精音律工尺牘後自徵梅乃入空門

朝來剩得好春陰芍藥屏花歲歲心解作流連是曉鳥一行茅屋綠陰深

清明

桃花雨過菜花香隔岸垂楊綠粉牆斜日小樓新燕子清明風景好思量

性道人吳江人周氏女原名瓊字羽步一字飛卿

陳迦陵曰羽步詩才清俊尤長七言絕句居如皋冒先生深翠山房八閏月吟詠頗多

詩話羽步適一士人為縉紳某所中陷囹圄自度不能脫命羽步往江北避其鋒經年篋中金盡所居陋甚破窗頽壁不蔽風雨然羽步意致翛然喜縱觀古史書愛吹彈時作數弄以遣興人以詩寄贈者羽步卽依韻和答無闌脂粉態不得志遂歸空門與吳蘆仙著有比玉新聲集黃皆令序之

和韻留別

易水興歌淚欲彈孤舟殘燭夢闌珊
篷窗寥落憑誰慰歧路蕭條強自寬
碧草寒煙江上畫野蔬村酒客中餐
更憐此夜溪前月愁殺離人不忍看

秋懷

朔風哀角起孤城強就東籬對菊英
俠氣驅愁存傲骨詩懷借酒出奇兵
碧雲黃葉清秋色蒲枕青鐙旅館情
做葛何堪當此際新涼漸向永宵生

秋夜感懷

風淒霜重葉初稀孤客無家雁亦歸
往事易悲休記省壯心難遂且忘機
深秋小院人愁坐澹月疎林鳥亂飛
遠戍城高殘角冷砧聲處處理寒衣

贈冒巢民

天涯浪跡幾年春
此日何期青眼頻
贈藥爲憐司馬病
解衣應念少陵貧
慙非駿骨逢知己
羞把蛾眉奉路人
聽雨不堪孤館夜
感今追昔倍沾巾

留別吳蕊仙

一身飄泊御風游
嶺上閒雲水上鷗
錦字怕隨江雁斷
詩魂還逐曉鶯流
野塘孤棹黃花晚
香谷寒窗雜樹秋
只恐重來仙路迥
煙迷露阻武陵舟

春居

小榻參差竹影斜
衡門芳草鎖煙霞
稜緙傲骨詩爲友
淡泊禪心畫作家
暝日不須來燕子
春風爭肯逐桃花
憑欄細雨瀟瀟夜
慷慨悲歌撫鎖鄒

清明感懷

積潤侵階碧草生
杏花寒食半陰晴
一簾細雨迷歸燕
幾日東風度老鶯
淚眼看花如有恨
旅懷中酒似多情
何時十畝偕賢侶
箕踞空山嘯月明

將歸江南次答鄧孝威

揚袂狂歌歸去來
五湖煙月冷蘇臺
遙憐竹屋分題處
花落重門草似苔

懶向人間道可憐
古來傾國盡嬋娟
花飛不煮胡麻飯
靜裏閒參柏子禪

野草荻蒲一徑通
短篷江上趁春風
亂鴉驚起投巢去
人在遙林落照中

幾許關心總不平
飄然湖海託餘生
閒雲好伴孤帆去
祖

道何人唱渭城

贈范洛仙

黯黯銷魂獨倚樓
登山臨水又逢秋
檐前垂柳絲千尺
只繫柔腸不繫舟

贈蘇貞仙

一架薔薇滿袖香
同行誰不羨紅妝
平生最愛清幽事
肯惜淩波繞曲廊

寄懷洛仙

蕭騷越客獨淹留
汗漫西風柳岸秋
安得東風解我意
好吹此恨到揚州

上鑒號輝宗長洲人吳氏女原名琪字葢仙一字佛眉
有香谷焚餘草佛眉新舊詩

陳迦陵曰蓋仙才情新婉當其得意居然劉令嫻矣
與飛卿著有此玉新聲集蓋仙尤好大略精繪染飛
卿詩云嶺上白雲朝入畫
樽前紅燭夜談兵蓋實錄也
詩話蓋仙為挺菴方伯女孫幼穎悟五歲過目成誦
暑齋工詩及笄能文尤精於繪事歸管字嘉二十年
卒嘉死於官蓋仙躬經艱險後昭慧鑑禪師遂飯命
出家漁洋題其畫云曉畫文殊淺黛眉幾九螺墨碧
參差懷今自作簪花
格不是當年衛茂漪

山中早梅雪後喜閨友任歸見訪

與君別江樹十年滯行跡忍使田園蕪可憐秋水碧道遠
夢何繇雁促音難繹一朝顧柴關白雲驚豔客澗松青若
故野人貧似昔午飯供新葵晚香論周易早梅覆屋紅積
雪映峰白一溪鳥語溶四壁琴書澤任運有虛舟放閒無
火宅相對綠樽開起舞南山石

題畫

江樹迷離鷗自浴江雲飄盡春山綠渡頭小艇賣魚歸月
映斜扉滿籬竹讀書樓靜倚欄杆一望煙霞碧落寒奇嶂
插天藏古寺危泉懸壁露巖灘玉笙聲斷鶯囀處狼藉落
花飛不去將身欲置畫圖間相與神仙覓往還

送別

雪意滿芳洲屏山引去舟霜花吹客夢笳月起邊愁萬里
從軍急孤身倚劍游家園落日裏莫上最高樓

幽居志興

戢影衡門下悠然物外身擇林知鳥異藏尾識龍神山靜
雲光活溪閒草色新廢琴兼病鶴相與得天眞

村居

貧家風物厭鉛華波影浮來盡落霞夢裏青山閒歲月鏡

中人面想桃花秋。燈病後，惟餘硯春水。愁多未浣紗枕上。
片魂誰喚起。夕陽煙樹幾歸鴉。

西山訪隱

人遠山深雲景新。青溪石落畫煙晴。飄殘絮影遙知柳。嘯
徧桃花不見鶯。沓嶂開天春一綫。危巖飛瀑雪千層。野猿
見客如相識。爲叩松關鶴自迎。

感懷

鶴煮琴焚事已賒。不堪回首數年華。愁來有句留殘葉。夢
去無人問落花。鳥惜晚香窺檻鏡。婢憐新病鎖窗紗。柳枝
剩有蘇臺曲。未審春風憶若耶。

閨友見訪感舊

蓬門來訪碧山秋。別久相逢話更幽。紅葉隱燈疎雨亂。白

雲堆榻晚風留自埋書劍新篁寺誰倚琴樽舊畫樓料得
百花洲畔月年年長照水空流

寄龔靜照

詩狂生性與君同遺世搜奇興不窮見說綠窗嫺劍術白
雲深處禮猿公

秋蟬

咽柳鳴槐較恨多一聲聲送夕陽過朱樓盡是笙歌地不
解悲秋奈若何

吳氏濟甯人

詩話吳氏性剛暴隨夫唐至松江飯依冰鐙禪師晝
夜持誦金剛經氣質遂變一日語人以近期又云吾
去後可留身三年至期說偈跌坐而逝越三年啟龕
視之顏色如生頂髮長半寸梁提督化鳳在府學宮
側爲建庵漆身額曰坐化有土人題一詩云齊女南
游證淨因樓居六載謝紅塵雲間歲歲香花祀爭拜

金剛不壞身

辭世偈

風捲雲霧散明月碧團圓了然無罣礙池內現金蓮

行剛字祇園嘉興人胡氏女伏獅院尼

詩話行剛適諸生常公振未期而寡中歲出家爲僧通乘弟子住邑之梅會里伏獅院有語錄見攜李詩繫

孟夏關中詠

百結鶉衣倒挂肩飢來喫飯倦時眠蒲團穩坐渾忘世一任塵中歲月遷

德隱蘇州人趙氏女原名昭字子惠有侶雲居橐

詩話子惠爲寒山隱君宦光女祖母陸卿子母文端容俱擅詞翰子惠能嗣其美適平湖文學馬仲子莊性好煙霞嘗葛衫椎髻自擬道民會仲子父難破家子惠遂入空門更號德隱結菴於洞庭西山中香林

匿影二十餘年亦吳越間
一奇女子也見櫛李詩繫

新秋晚眺

山中多晚涼清風厲秋節遙瞻四五峯壁立皆奇絕修竹
傍林開喬松倚巖列黃菊散芳叢清泉凝白雪對此懷素
心千里共明月願保幽貞姿歲寒雙皎潔

種竹歌

南山南北山北其中有竹人不識託根數莖臨嚴霜虛心
願並幽溪柏秋深草木零落盡此竹亭亭終不易

春日泣懷先慈

蘭閨儀範廿年餘德耀神葩玉不如坐帳每教吟五字遺
奩親自繪雙魚最憐辛苦懷蘭佩猶憶提攜載鹿車風木
有情腸欲斷夢中空自學牽裾

山月集言四卷一七
二
當湖文園聞已墳茂草慰外君

遙望殘陽落故墟更傳烽火徧州間
綠沈渭畝臨溪竹香散文園滿架書
釣艇蒼茫浮少伯琴臺寂寞憶相如
多君腹笥依然在詞賦翩翩好似初

祀寒山先墓

一天風雨倍傷離回首寒泉曲澗西
伯道祠邊猿獨唳中郎墓上鳥空唳
塵飛臺閣書還在雪壓松筠鶴自棲
從此素絲憑世染漫憐志與白雲齊

皆令黃夫人過寓山閨卽事

吟得新詩子夜殘銀缸點點照花欄
須臾小婢來相報深竹烏唳月滿灘

美人

眉鎖春山鬢點鴉莫將桃李鬪芳華無心去逐風流隊問
向雕闌數落花

維極餘姚人仁和雄聖庵尼

詩話雄聖尼庵在義同坊女僧維極卓錫地也極以
童身嗣法於雪竇石奇雲和尚順治丙申應侍郎嚴
沆儀部丁澎請爲開戒說法一日貴家觀妝而來極
曰何來曰拜佛極大喝曰汝家有佛諸女言下頓悟
康熙壬子秋圓寂建塔龍居塢丁澎爲撰碑銘維極
微言清雋尤工倚聲其詠梅云春來了鶯來了陳解
霜枝小萼新姿巧聽雁云博衣聲
起家家聽不盡西澗芭蕉送雨

題蓮花

幻出是毫間休作愛蓮說花葉不沾塵從今莫饒舌

超越仁和人武昌同知林杞女雄聖庵尼

詩話超越嗣法維極廣纂
其師詩文語錄傳於世

憶維極師

冰雪家風古蕭然大室中當年親教誨數語發愚蒙生死
愚難報箕裘愧未工妙峯還掬土道範邈何窮

明萱字悟眞仁和人蔣氏女原名宜有藥閣偶詠

詩話悟眞名家慧質年二十侍伊璠謁費淨容大師
求出世法及伊璠卒遂翦爪髮皈依淨土著明心錄

卷二

秋夜

忽見梧桐染淡黃更聞鷓鴣叫秋霜不因白髮催明鏡且
抱紅心寄上方就竹開窗通海月當庭種桂散天香閒來
擁衲憑高坐靜聽疎鐘萬慮忘

落葉

消瘦寒林意自悽可憐零落在東西妒風何苦相凌逼眷
戀枝頭不忍離

霜染千秋色不同縱然嬌豔也成空憑風分付東流去耐
等寒枝春不窮

題英石

寂寞東山草更萋孤峯獨立絕恆蹊年來不與人相見風
雨蕭蕭鳥自嘯

元端字御符嘉定人盧氏女長洲堯峯尼

詩話御符家在南城年十二祝髮於堯峯女師年止
十二後受天童山曉和尚法開堂於杭州明因嘉興
伏獅兩寺

書齋偶詠

楊寄閒窗下相攜話昔游烹茶成雅集開卷足清修宿雨
花生潤微風鳥自謳留將殘照影靜拂素絲幽

石巖仁和人蔣氏女原名薺英辟支庵尼

詩話石巖幼慧多才藝初爲巨室侍姬文學六朝詩宗溫李書法華尤精篆隸時作蘭竹小畫於琴尤得絕調綺年頓悟受偈講壇蓋朝雲琴操之流也

燕

滿院晴光好穿簾小燕紛數聲驚午夢雙翦碎春雲戲水香泥溼衝煙夕照曛參差頻上下紅嘴掠青芹

春夜與閨音師詠月

皓月輕飛處經堂寂不譁碎光穿竹罅圓影架松叉露溼巢喧雀風梳草亂蛙與師清課後相對理袈裟

曉起遣興

風掃雲殘霽色開松根馴鶴舞蒼苔蟻拖榆莢緣牆去蜂抱花鬚撲檻來一雨綠盈分竹院四山青壓鼓琴臺悠然獨立斜陽下結陣烏鳶噪古槐

憶夢

蕉團穩坐好安禪
炯炯金鐙法座燃
慧鳥鳴來深樹裏
亂山飛入小窗前
雲鎔碧海摩晴日
露洗空天散曉煙
記得夢中參我佛
色空空色悟真詮

答蕊仙六姊

巫峽行雲夢已遙
不須禪棒與詩瓢
白雲深處青山裏
一箇蒲團萬慮消

題達摩像

折葦江流疾似帆
九年枯坐向寒巖
靜中悟得言詮笑
把如來大藏緘

妙慧江甯人張氏女原名如玉字楚嶼

詩話妙慧熟精文選唐詩善小楷八分及繪事初隸
樂籍心獨厭薄紈綺品題花月指點溪山爲名流所

企慕後受戒於棲霞法師焚修以歿

飲雨花臺賦落葉

登眺臺千尺論心酒一尊青霜侵樹杪丹葉舞江村逐浪同浮梗隨風欲斷魂榮枯何足歎此日幸歸根

妙惠長洲人范氏女般若庵尼有曇花軒草

詩話妙惠歸李峙巖年餘李卒父母勸其改適作柏舟操以自矢父母歿乃祝髮於葑溪之般若庵艱苦修持從學者衆年八十餘無疾坐化

般若招提曉坐

夜雨洗山巖朝來翠獨溼趺坐學觀空清風滿香積正因字本無而我好翰墨心卽等死灰未了人間孽窗竹皆虛心庭松多勁節體此長青樹原不在虛實何況鐘魚間梵理更無得坐久聞妙香慈航如可接

寂居字悟源太倉人王氏女

書懷東紫蘩女史

花鈿翠袖久蠲除經案繩牀意自如性懶已忘僑慢習家
貧猶惜舊藏書談空有弟窮禪理適興從親學蠹魚更喜
蕭疎塵慮少草衣木食足安居

靜諾仁和人林氏女號自閒道人雄聖庵尼有息肩廬

詩草

詩話自閒爲彝白太守幼女道時不偶入空門垂三十
餘年話天崇間事如昨日嘗結廬河渚每至萬樹
梅花千樹荻雪自謂此中有真悟處閨中從受佛學
者恆數百人偶出詩一卷示人曰宗門不立文字今
老矣尙戀戀做帶亦自笑多此一念也

幽居靜坐

幽居惟自適一編聊自遣白晝一何長安不自黽勉古人

雖往矣微旨亦須闡空簷滴長漏爐香生寶篆每當興會
嘉雙手不釋卷嗟哉世俗子不解親墳典

歲暮作

時序自推遷忽然驚歲暮舉目見寒鴉悲鳴如欲訴太陽
慘不舒同雲四野布朔風時北來哀號滿庭戶翹首望陽
春陽春不我顧居諸如隙駒剝啄有定數況我世外人浮
雲已如故園有數株梅結伴儘堪度

古梅歌

閨苑瓊姿不記年屈曲古幹如龍盤大庾萬枝只如此迥
旋曲折空山裏吐萼枝枝色正妍移來小艇泊流泉斜枝
倒浸冰魂化狂呼游客添杯罍我欲攜筇過隔溪竹林主
人遠相迂莫謂韶光遷久留人生適意多偷暇

過永慶寺逢牡丹作

東風習習春將夏
寶馬香車如放假
夾道松杉滿徑陰
黃鸝坐語春風下
偏反綽約逞嬌顏
徘徊終日不知還
花王似殿東王令
好鳥枝頭笳鼓競
莫言花落不如人
人老能如花更春
惟有青山常對峙
年年花落路傍塵
小鳥欲答忽飛去
宛轉如歌昔時句
但使衰年無病侵
歲歲花前常小憩

夏日晚晴

窗白雨將去猶存
一帳寒神清無俗
夢心定不生瀾
紅溼知蓮苦聲遲
識漏殘畫梁新燕
小窺棟語般般

舟泊姑蘇

扁舟今夜泊遙對
闔閭城霞落浦雲
晚鴉眠山月明片
帆

歸路遠千里客心驚鼓枻不成寐蕭蕭何處聲

河渚初夏

石枕藤牀萬慮忘跣趺不逐世間忙風生蒲扇人情冷竹
映紗窗月影涼隨地可消清夜永無心嘗戴野荷香門迎
流水塵聲遠檻外松溝入耳長

贈楊夫人

一種高風迴絕塵何緣邂逅覺生春青蓮堪證無生法紫
誥仍輝現在身性潔自甘泉石操談元喜與法王親金陵
風物稱殊絕道左流連話轉深

春宵卽事

野藤花氣暗隨風狼藉春光一半空斜倚石欄頻望處滿
庭明月有無中

閱楞嚴經

青蓮自是出淤泥在處明心更不迷寄語學人須著意本來無染卽菩提

詠秋蘭

長林衆草入秋荒獨有幽姿逗晚香每向風前堪寄傲幾因霜後欲留芳名流賞鑑還堪佩空谷知音品自揚一種孤懷千古在湘江詞賦奏清商

僧鑒吳縣寒山庵尼

詩話僧鑒絲竹俱精談諧入妙見七十二峯足徵集

秋海棠

紅甲垂垂白露姿薜蘿牆下最堪宜不教鸚鵡呼肥婢肯與蓮花作侍兒幾處閉門秋雨後何人立月晚香時愁腸

欲斷非關汝續命無煩葉底絲

初夏

落盡紅芳入夏初槐陰繞屋竹扶疎清風一室閒鐘磬疎
雨幽窗自看書

靜維華亭人盛氏女原名韞貞有寄笠遺橐

詩話靜維爲夏氏淑吉中表姊嘉定侯明曾爲季子
翁求婚其父母許之實未聘也已而溺不知所終靜
維著懷湘賦以見志旋視髮
師事淑吉淑吉歿爲作傳

秋宵對月

夜靜天地涼憑樓獨凝眺煙樹色離離雲山望中杳萬籟
寂無聲數螢流木杪青鐙照羅幙殘葉鋪池沼悲哉今古
情乾坤徒浩渺憂懷自蒼茫至意漠難曉姮娥知我愁流
影來相照當持金石心千秋同皎皎

題春草堂

謝公游眺地春草已無根夕巷牛羊下空簷鳥雀喧可憐
盱盼盡徒有簡編存淚灑西州路何人酹一樽
十載重游地孤城帶落暉西園迷舊跡北渚長新磯玉樹
人俱盡金庭事已非何須聞短笛獨立自沾衣

贈聖幢師

自是閨中秀超然遠物華心能同水月骨自帶煙霞翠長
眞如竹黃開般若花寄言劉鐵磨應識趙州茶

夜坐

殘鐙照簾幙樓閣有餘情落葉堆蛩砌涼風吹雁聲暮蟬
愁裏聽河漢望中橫獨坐悲秋夜疎櫺淡月瑩

村居雜感

春山斜遶郭淶水滿晴川白鳥孤雲外青林返照邊風波
何處少耕鑿此中偏莫作途窮歎聊同鹿豕全

碧海

碧海風濤靜不飛凌霄閣敞雲扉擁書千卷無人到翦
燭三更有鶴歸漢殿香消青鳥去緱山秋冷玉笙微劫灰
辨得餘悲愴獨向人間寄衲衣

傳正仁和人繆氏女萬善庵尼

詩話傳正爲仇昭素側室昭素連喪子女及娶繆得
子超鑑絕嬖愛之乃傳正力辭出世遂捨身萬善日
夜坐蒲團八年如一日嫡王氏化其真誠撫其子若
己出昭素歿嫡與其子無所依傳正迎養送其子於
藥師菴又能開示善類如文學沈希珍妻黃氏觀察
沈循妻陸氏皆師事之康熙甲寅年五十四留偈坐
化見仁
和縣志

辭世偈

五十餘年似夢中今朝四大各西東了明性海無生法更有何言說苦空

智生仁和人黃氏女原名垞同縣陸鈞聘室

陳迦陵曰智生生而端麗能詩歌小令願性喜學佛歲癸巳病甚父母痛之女曰金鎗馬麥定業難逃大

人獨心無所苦年十九天痛耳心無所苦年十九天詩話智生事詳見顧若璞孫女垞兒往生紀實篇末稱其嚴持家秉雅愛琴書從伯氏學詩亦有雋句勤於紀錄時帷鏗伏枕手書成帙所存金剛經注解及古今詩歌若干卷可考也

祖母命題菊花

簾幙暗生香奇葩勝豔妝不隨秋草萎獨立傲繁霜

春日風雨

何事催春去殘紅逐雨飛飄風無處所來歲可能歸

宮詞

長信宮中侍宴來玉顏偏映夜光杯銀箏彈罷霓裳曲又
報西宮侍女催

夏詞

炎威天氣日偏長汗涇輕羅倚畫窗蜂蝶不知春已去又
銜花瓣到蘭房

詠雪

霏霏玉屑點窗紗碎碎瓊珂響翠華乍可庭前吟柳絮不
知何處認梅花

德曰泰州人蔣氏女原名葵字冰心號普林有拂愁集

詩話冰心早慧識字即知其義學詩輒工于歸陳氏
一錢夜讀家人咸以女書生日之內庭謀集每飲酒
高論有名士風贈妾詩有嬌凝我見
猶憐爾之句人稱其德量後為尼

詠新柳

嫩軟新枝不受肥。小蠻醉舞比腰圍。欲舒青眼情難寄。但說蛾眉事總非。纖巧鶯梭輕拂縷。翩翻燕翦欲裁衣。隨風婀娜春無限。銷盡吟魂好句稀。

暮春苦雨卽事

年來惟有感傷多。九十春光總浪過。鏡裏容顏空自老。夢中詩句爲誰哦。飛花滿院銷銀蠟。細雨空簾鎖黛蛾。可惜繁華零落盡。香殘酒冷奈愁何。

雨中新柳

深黃淺綠雨中新。纔倚雕欄更損神。翠色最宜侵少婦。柔條未可贈離人。衣沾清淚時時溼。眉染濃煙故故顰。無力舞風飛更歇。由來腰細不勝春。

夢醒聞雁卻憶女弟

依稀蓮步夢中來
忽聽孤鴻意自哀
爾爲失羣子憶妹煩
君寄淚到妝臺

新燕

穿徑銜泥漾好春
翩翩鬬舞羽毛新
暝風吹入昭陽殿
妬煞輕盈趙美人

雨窗有感

梨花零落事堪悲
訴與孤窗夜雨知
靜坐幾回憐命薄
顰蛾正是斷腸時

茉莉

一笑風前盡吐香
摘來幾朵倍芬芳
瓊姿馥馥羞珠翠
留與嬋娟助晚妝

月下梅影

輕籠淡月異濃妝欲賦慙無白雪香卻到夜深人靜後一枝移向碧紗窗

聞鄰女哭聲

閒看征雁立花陰處處西風落葉驚我爲相思腸欲斷不堪又聽斷腸聲

初秋

蕭然一葉下梧桐初覺涼生小閣風暑氣潛消人意爽卧看新月到簾櫳

涼夜西風枕簟清鐘聲送月傍柴荆寒蛩也識秋光到砌下窗前處處鳴

輕煙冷露染衣寒無數流螢繞畫欄睡起悄然時悵望秋聲一片在林端

德月泰州人原名蕙字玉潔號雪齋蔡女弟

詩話玉潔以命舛與女兄冰心祝髮爲尼同參淨業詩多悽楚之音

兩夜夢與冰心女兄話舊醒來拈韻

孤窗閒卧不勝愁夢逐嬌癡舊地游繡閣牽衣欣聚首妝
臺倚膝倩梳頭驚魂夜半蕭疎雨分袂更殘寂寞樓枕上
傷心無數淚曉來甯忍一舒眸

送花女兄

遙想娉婷態曉妝梳裹鮮玉英三四朵送綴綠雲邊

秋夜聞蛩

蛩音唧唧最關情無限秋光映畫屏銀燭高燒更漏永不
堪聽處總成吟

香奩和姊氏韻

無聊月下獨焚香暑氣微消漸覺涼徙倚花前頻悵望何時重見玉人妝

小院涼生落葉風天街玉露溼花濃懷君淚筆難題句瘦減腰圍總病中

小閣閒憑遠緒生香茶獨啜不勝情遙思月下吹簫態料對乘龍跨鳳人

夢裏相逢淚似波雲煙共滌對君多秋聲驚起愁人恨悵望遙天橫玉河

攜愁帶病強吟哦自恨紅顏薄命多一夜詩成無數淚從今休想對君歌

多病傷神力不支一彎新月照愁思昨宵魂夢牽衫袖拈韻依稀賦別詩

貪看新月不成眠彷彿清宵對玉娟詩思君家推絕調吟
成白雪卻非鹽

新詩賦就更添妝散步迴廊轉畫堂多病慈親欣執手愁
中對月且流觴

凋零門戶不成家骨肉相看空自嗟愁到夜深渾欲寐杜
鵲啼破綠窗紗

鏡中小影豈無雙琴鶴看來祇自芳鎮日陶情詩共酒雀
屏無意選東牀

悟情字石蓮丹徒人翁氏女

詩話石蓮有女兄爲尚書和琳妾石蓮依之和及女
兄殉焉遂南歸主女史駱佩香家趙鳳北聞其才會
贈七古一首載集中佩
香繼歿石蓮祝髮爲尼

感懷

清淨而今徧六根焚香幸作佛前人已知性海須登岸且
向恆河試問津口藏誰傳彌勒法心鎧自照女兒身癡情
一點消難盡吟到詩篇忘苦辛

蒼茫回首萬緣空漫說平生塞與通眼見公侯興敗易命
憐姊妹死生同只留此日袈裟在不見當年錦繡叢坐徹
蒲團波浪息心緣穩渡片帆風

宛仙石氏女長洲洞庭東山尼

詩話宛仙爲洞庭東山石如玉女許字某氏
子貧而喪檢因入空門見七十二峯足徵集
莽中寫懷

禪關畫掩絕塵踪前有修篁後有松野鶴去時人少伴曉
雲起處壁添峯當時自識塵緣淺今日誰知道味濃千里
赤繩從此斷超然何用講三從

翁氏仁和泥有息肩廬詩草

松鼠

炯炯雙眸狡如梭繞樹柯長公曾有賦貞女刺無牙性癖
猶耽果情頑不息花行藏那可問穿穴是生涯

綠牡丹

一枝嬌豔殿春開疑是芭蕉分影來雲鬢漫勞秦女挽宮
紗須趁曲江裁輕盈自可藏幺鳳綽約偏宜映古槐回首
梁園他日事不禁花下幾徘徊

智圓字湛然常熟人殷氏女

孫貞媛詩

月皎皎風瀟瀟貞魂跨鶴翔雲霄霧鬢煙鬟人不識一炷
梅檀默與招旃檀香遠飄如篆環珮初過廿四橋橋頭有

客迎仙馭相對箕壇夜沈寥靈符軌感蕙雲女不比人間
花木妖蕙雲秀毓吳淞里烏衣貴族珥金貂父掌銓衡作
卿貳忠心貫日歷班僚明師動地烽煙起鼙鼓喧闐至正
朝大厦傾頽燕雀盡剩有孤雛逐絮飄孤雛賴嫗相奔竄
襁褓呱呱魄蕩搖避秦難覓桃源渡且向珠湖撥短橈漂
母祠邊僑寄穩一枝棲息同鷓鴣家鄉尙隔長淮水回首
燕都路漸遙世亂初平疇庇倚羞澁空囊命不聊飲蘂茹
荼總酸楚淒涼暮暮還朝朝流光迅速驚馳駛轉眼盈盈
羨阿嬌養就嬌嬈真可羨花枝如靨柳如腰更憐殘喘溘
然逝空閨獨守心憂焦自分門庭久零落春風無意誇桃
夭強暴侵凌畏多露誰知惡客盜紅綃掠賣揚州守貞女
向訴無人怨未消淚凝朱袖憑珊枕鏡掩青樓棄翠翹自

此繁華竹西路歌吹從他意氣驕妾心好比瓊花冷誓死
泉臺志獨超往事沈淪四百載精靈未散廣陵潮聞卿已
謫仙班久琳宮翠水瑩芳標願和湘女彈瑤瑟不伴秦姬
弄碧簫臨壇帶淚敘疇昔松柏甯隨衆卉彫丈夫節概當
礪落烈行偏從巾幗昭留得表貞詩百首輶軒佇望采風
謠

弔彭娥

娥南通州人夫貧甚謂彭
髻乳以活彭不從自經死

匹婦得成名寒門志甚貞乳雛憐燕羽逐婦惡鳩聲智以
窮愁短身因激烈輕寸膚如可髻涇渭不分明

次韻題明妃圖

遙辭漢殿淚痕稠沙漠淒淒雁陣秋到此畫工忘故我也
驚愁緒鎖眉頭

妙霓字靜韶吳江人幼爲尼江氏女

春夜

新篁風韻夜窗幽好夢驚回悲舊愁一瞬春光歸去也子規啼月下西樓

明修字可尙號東悟常熟人高氏女維摩寺尼有鑒雲

留迹

詩話東悟誕時母夢神語云是女有夙根足爲爾家傳宗生而茹素既長矢志不字以奉養老母母歿每食必設几具饌作謹侍勸餐之狀歷久靡倦後母受戒說法不廢吟詠歷朝峨嵋普陀五臺諸名山著諸錄一卷

合江

合江山色好耐可雨連綿欲覓峨嵋路須憑般若船雲峯呈曉景仙樹帶秋煙咫尺翹瞻處將登第一天

送親禮師登戒

幻途無處不朝真從此休言涉世塵
陟屺正堪慈月好登堂又喜覺華新
三遷教子緣方得六十耆英道正親
此去報恩兼利衆坦然顯現法王身

示衆

妄談般若妄談宗誤引羣聾學我聾
夙契心源形實相事隨世理顯虛空
人因有執機皆塞物爲無情道盡通
可是箇中真的處太陽西去水流東

泊舟

漁火村燈兩黯然暮雲空隙見長天
波平江面光微動瑞靄輕搖不是煙

心中躋縣人

詩話心中爲滌之大伾山人其和天台雅集韻詩有
云家佳桐廬水石寰隨親游幕未南還則其先固浙
人也

和天台雅集韻

年來觀道禮三賓情夢神游法界頻今識仙源渾不遠傳
將鐵筆盡鉤銀

南池旌旆建高秋又看移來豫北留昨日大伾山下過恩
光先被驚峯頭

玳筵珠履客爭歸公暇朝衫換筆衣從此安昌成朗苑衙
齋花軸又增輝

家住桐廬水石寰隨親游幕未南還髫齡失怙傷孤露十
載跼趺洛下山

學和陽春逸興遙吟餘花雨霏風飄瑤池未許蓮池匯何

處慈航度法橋

棠蔭淇源故老知王公路柳繫人思而今繡斧清霜肅正
是繩徽式穀時

摩淨震澤人任氏女有桐里詩草

詩話摩淨能詩自茹素奉佛豈志情修遂盡
焚吟藁不欲留傳僅於虎邱志中見一絕

經虎邱

鹿走蘇臺春寂寂江花江草傷心碧行人不見古今愁指
點青山王珣宅

鏡明字定安仁和人陳氏女孝義菴尼

詩話定安七歲父母以其多病捨身孝義庵爲尼上
九歲受戒孝義庵爲蓮池大師室湯太素焚修地定
安心慕力追劫後庵改講舍卒懇願力於庵側建精
舍又就雲棲太素塔旁結普同一塔皆以苦行成之
示寂時年八十有二

口占示徒

庭中卓刹竿懸旛更懸鐙鐙明大千界旛引最上乘
門外河之水照面復照心眞面何虞皺道心須要深

慧機錢塘人譚氏女慈孝庵尼

詩話慧機生有宿根聞經了悟初依慧心庵願老人
重修繼從崇福寺昌公披薙先後然兩手指以示堅
定庚辛間避難越中瑞生庵不輟禪誦甲子歸杭得
三撥營慈孝曹庵誓願重興建大雄殿觀音殿西方
三聖堂恭請龍藏建閣供奉嚴然叢林規模儲如
山室覺羅夫人法名善一輯藏中雜垢施女經寶女
所問經老女人經腹中女聽經月上人皆慧機助成之
種編爲摩尼燭坤集要刻施善女人皆慧機助成之
答覺羅赫舍里夫人

山雲歸自山水雲歸自水問雲雲無心還問看雲子

晚晴移詩匯卷一百九十九終